

Valurs èn pli impurtantas

La Partida cristiandemocratica sa fatschenta cun opziuns strategicas e cun il num

DAD ANDREAS CADONAU / FMR

■ **La Partida cristiandemocratica ha lantschà la discussiun davart la noziun cristiana en l'agen num. Ina discussiun che fatschenta il commembradi da la partida a la tschertga da nova clientella politica senza vulair vilentar clientella existenta.** La discussiun davart l'avegnir da la noziun cristiana en il num da la partida ha bain cuntanschì la Surselva che vala sco ina ferma pitga da la Partida cristiandemocratica. Quai ha il president da la pcd Surselva, *Kevin Brunold*, confermà. La discussiun n'ha anc betg chattà la via en la glista da tractandas da sia secziun. Reacziuns sin l'annunzia da la pcd svizra da vulair metter en discussiun il num da la partida, respectiv il term cristian, ha bain leventà discussiun. Brunold ha constatà che las generaziuns guardian cun differenta perspectiva sin la dumonda cristiana. Per la generaziun pli passada domineschan aspects tradiziunals enfin istorics che pledan per mantegnair il num. Persunas pli giuvnas èn main attachadas a dumondas da la religiun.

In aspect antiqù


In fatg che la deputada *Silvia Casutt* ha medemamain constatà. Ella deplorascha ch'il term «cristian» en il num da la partida vegnia mess a pèr en la publicitad cun il term «catolic». Per la deputada e vi-

cepresidenta da la pcd grischuna è quai ina vista politica antiquada. Per ella identifitgeschan las valurs cristianas dal num la moda da patratgar e da viver da las naziuns dal vest. Ed ord questa optica nun è ella intgantada da stritgar cristian dal num da la partida. Casutt na vul dentant insumma betg impedir la discussiun interna davart cristian u betg cristian. Ella è numnadamain stada confruntada cun reacziuns da persunas pli giuvnas ch'han attestà a la pcd da perseguitar interessantas finamiras politicas. Dentant da betg esser prontas da sustegnair quella politica gist pervia dal num da la partida. E la giuventetgna ha era Brunold pledentà e la necessitad da sa drizzar als giavischs da nova clientella politica. Per el èn la fin finala il cuntegn e la lavur politica pli impurtants ch'il num da la partida. Brunold ha menziunà da represchentar ils interess economics dal mestergr sco da resguardar ils basegns socials ed ecologics, politica dal center.

Rinforzar il center

Che la concentrasiun da las forzas politicas en la fracziun dal center en il parlament federal ha intimà la pcd da lantschar da nov la dumonda dal num da la partida nun è da snegar per Brunold. La Partida burgais-democratica tschertga medemamain sia via futura suenter ils resultats da las elecziuns naziunals. Bru-

nold vesa ina via comunabla da las duas partidas sin palancà naziunal per in bun tant pli simpla che sin palancà chantunal. Tant pli che la pbd gioga strusch pli ina rolla en la politica naziunala. Ord vista chantunala vesa



il cusseglier naziunal *Martin Candinas* bain intginas perspectivas per in agir pli stretg tranter pbd e pcd. Gist per la pbd che pudessia uschia porscher a ses commembers giuvens ed activs ina perspectiva per ina carriera politica sin nivel naziunal. Per il cusseglier naziunal da la pcd èsi

necessari da definir scenaris che pussibileschan da crescer, respectiv augmentar la quota d'electurs. El ha constatà ch'i saja reussi a la pcd da sa stabilir. Quai na tanschia dentant betg per l'avegnir. La pcd, respectiv il center politic, stoppia evaluar tuttas pussaivladads per pledentar gliעד pli giuvna er en ils centers urbans. Entaifer quella tschertga strategica saja la dumonda dal num futur da la partida vegnida lantschada, ha explitgà Candinas.

Pitschnas differenzas

La deputada *Silvia Casutt* na vesa strusch impediments da la vart da la pcd per ina pli stretga collavuraziun cun la pbd sin nivel chantunal. Tant pli che las differenzas politicas na sajan betg fitg divergentas e las partidas pledentian la medema clientella, sco ch'ella è s'exprimida. E dal reminent en divers intschess grischuns, geograficamain na stattan pcd e pbd betg fermamain ina a l'autra sin ils pes. Forsa gida la pcd in'egliada en il chantun Tessin per tutgant definir il num. La pcd tessinaisa sa numna numnadamain Partito Popolare Democratico. E quai suenter avair midà num almain quater giadas dapi la fundaziun l'onn 1848.